

'BERBAGAI PERGOLAKAN TELAH DIHADAPI' Rithauddeen gembira imeg Malaysia tinggi di peringkat a-bangsa

KUALA LUMPUR, Rabu — Bekas Menteri Luar, Tengku Ahmad Rithauddeen gembira dapat berkhidmat selama tujuh tahun di kementerian itu dan berjaya meninggikan imeg dan kemampuan Malaysia di peringkat antarabangsa.

Tengku Ahmad Rithauddeen akan memulakan tugasnya sebagai Menteri Perdagangan dan Perindustrian minggu depan.

Berucap di majlis perpisahan yang dihadiri oleh pegawai kanan dan kakitangan Wisma Putra di sini hari ini, beliau berkata, selama 7 tahun di Wisma Putra beliau menghadapi berbagai pergolakan antarabangsa.

"Saya amat gembira selama memegang jawatan ini, kita telah berjaya membawa imeg negara ke peringkat antarabangsa dengan kemampuan yang baik," katanya.

Turut hadir ialah bekas Setiausaha

Parlimen Kementerian Luar Negeri, Encik Kassim Ahmad yang bertukar ke Kementerian Pertanian dan Ketua Setiausaha Kementerian Luar, Tan Sri Zakaria Ali.

Menurut Tengku Ahmad Rithauddeen, beliau mengetahui pertukaran jawatannya dalam kabinet Datuk Seri Dr. Mahathir Mohamad sebelum beliau bertolak ke New York.

"Perdana Menteri telah bertanya kepada saya samada saya sedia ditukarkan ke Kementerian Perdagangan dan Perindustrian dalam kabinet baru," katanya.

Tengku Rithauddeen yakin negara-negara Asean akan mengambil dayausaha yang lebih sungguh-sungguh mencari penyelesaian masalah Kampuchea.

"Masalah Kampuchea hendaklah diselesaikan oleh semua negara melalui Bangsa-Bangsa Bersatu atau forum antarabangsa yang lain," katanya.

Beliau berkata, Malaysia telah menyatakan pandangannya dan

berjaya membuat garis panduan bagi menyelesaikan masalah Kampuchea di sidang Bangsa-Bangsa Bersatu di New York baru-baru ini.

"Saya yakin dengan bantuan ketua-ketua negara Asean, satu pencapaian yang konkrit akan dicapai bagi mempengaruhi Bangsa-Bangsa Bersatu," ujarnya.

Ketua Setiausaha Kementerian Luar, Tan Sri Zakaria Ali dalam ucapannya berkata, Malaysia berjaya menentukan dasar luar yang baik dan dapat diterima oleh negara luar melalui pimpinan Tengku Rithauddeen.

Katanya, Tengku Rithauddeen telah berkhidmat selama tujuh tahun di Wisma Putra yang banyak menghadapi berbagai pergolakan politik antarabangsa.

Malaysia menghadapi berbagai masalah yang memerlukan penyelesaian segera, tapi dengan pimpinan beliau, kita dikagumi di peringkat antarabangsa."